

LKIM sedia bakul makanan kepada 9,000 nelayan

BH 04/11/23 M/S 21

Kuantan: Lembaga Kemajuan Ikan Malaysia (LKIM) menyediakan bakul makanan bernilai RM250,000 bagi membantu kira-kira 9,000 nelayan Zon A di Pantai Timur yang tidak dapat ke laut pada Monsun Timur Laut kali ini.

Pengerusi LKIM, Muhammad Faiz Fadzil, berkata bantuan keperluan asas itu bertujuan meringankan beban nelayan yang kehilangan sumber pendapatan dalam tempoh panjang.

Beliau berkata, kerjasama Persatuan Nelayan melancarkan lagi proses pengagihan bakul makanan itu apabila Monsun Timur Laut (MTL) bermula dan nelayan Zon A tidak dapat turun ke laut untuk mencari rezeki.

Katanya, LKIM simpati dengan nasib nelayan Zon A atau nelayan pantai yang tidak dapat turun ke laut setiap kali tiba MTL, justeru bantuan bakul makanan diperkenalkan khusus untuk nelayan di Pahang, Terengganu dan Kelantan.

"Nelayan Zon A sudah menerima bantuan sara hidup RM300 setiap bulan. Bakul makanan yang diterima pula diharap dapat meringankan beban mereka yang bergantung sepenuhnya pada pendapatan daripada hasil laut.

"Saya difahamkan Persatuan

Nelayan di Pantai Timur juga menghulurkan bantuan keperluan asas kepada ahli mereka setiap kali tiba MTL, sebagai tanda prihatin terhadap ahli," katanya.

Beliau berkata demikian pada Majlis Ramah Mesra Madani Libat Urus Bersama Pengerusi LKIM Bersama Nelayan Pahang serta Pemberian Bantuan Kepada Nelayan di pekarangan surau perumahan nelayan Bunut Rendang, kelmarin.

Pada program itu, seramai 72 nelayan Zon A menerima bantuan peralatan menangkap ikan seperti pukat, tong ikan, timah, pelampung dan dua unit enjin sangkut, serta bakul makanan.

Dalam pada itu, Muhammad Faiz berkata, nelayan Zon A diingatkan sentiasa berhati-hati sepanjang MTL, dan dinasihatkan tidak turun ke laut, terutama apabila angin kencang yang menyebabkan laut bergelora.

Katanya, nelayan perlu sentiasa mendapatkan maklumat semasa dikeluarkan Jabatan Meteorologi Malaysia (METMalaysia) jika ingin ke laut dan berunding di kawasan pulau sekitarnya ribut berlaku di tengah laut, manakala setiap bot harus dilengkapi peralatan keselamatan.



Muhammad Faiz (dua dari kanan) mengagih bakul makanan kepada nelayan di pekarangan surau perumahan nelayan Bunut Rendang.

(Foto Mohd Rafi Mamat/BH)